

四庫全書

經部

欽定四庫全書

經部

春秋左傳要義卷

十四

詳校官監察御史<sub>臣</sub>李陽樸

給事中<sub>臣</sub>溫常綬覆勘

總校官檢討<sub>臣</sub>何思鈞

校對官編修<sub>臣</sub>孫玉庭

謄錄監生<sub>臣</sub>趙炎

欽定四庫全書

春秋左傳要義卷十

宋 魏了翁 撰

莊公九年至十五年

一 小白子糾各有黨伐乃得入

注二公至無位正義曰傳稱鮑叔牙以小白奔莒管夷吾召忽奉子糾來奔則二子在國寵均勢敵故國內各有其黨今齊大夫來盟于既直是子糾之黨來迎子糾

耳小白之黨猶自向莒迎小白也若其舉國同心共推子糾來迎即宜付之不須以盟要之今既與之盟而興師送糾是二公子各有黨須伐乃得入故公伐齊也昭十三年傳稱桓公有國高以為內主則國子高子是小白之黨也彼迎小白既早公送子糾又遲公伐齊納子糾始行即書小白入齊得告乃書故至齊之時出小白之後也傳例曰凡去國國逆而立之曰入小白稱入從國逆之文以其本無位也若本有位則當云復歸賈服

以為齊大夫來迎子糾公不亟遣而盟以要之齊人歸迎小白謂迎小白者還是盟莒大夫故杜言各自有黨以排之

二 齊桓忘怨而用管仲

此傳大畧世有管子書者或是後人所錄其言甚詳其小匡篇曰桓公自莒反於齊使鮑叔牙為宰鮑叔辭曰君有加惠於臣使臣不凍餒則是君之賜也若必治國家則非臣之所能也其唯管夷吾乎公曰管夷吾親射

寡人中鉤殆於死今乃用之可乎鮑叔曰彼為其君勤也君若宥而反之其為君猶是也公曰然則為之奈何鮑叔曰君使人請之魯至於堂阜之上鮑叔被而浴之三桓公親迎於郊遂與歸禮之於廟三酌而問為政焉外傳齊語與管子大同管子當是本耳管子無治於高傒之言鮑叔之美管子其言非一說者各記所聞故不同耳

三  
楚始稱荆僖元年後稱楚

荆楚一本二名故以為國號亦得二名終莊公之世經皆書荆僖之元年乃書楚人伐鄭蓋於爾時始改為楚以後常稱楚

四 宗社亡稱滅未亡而君見獲稱以歸

以蔡侯獻舞歸正義曰穀梁傳曰以歸猶愈乎執也杜於隱七年注云但言以歸非執也國君者社稷之主百姓之望當與社稷宗廟共其存亡者也而見獲於敵國雖存若亡死之與生皆與滅同至於偏軍元帥君之臣

僕出身致命榮辱得失自其常事故傳曰胡子髡沈子  
逞滅獲陳夏齧君臣之辭也如杜此言師敗身虜亦應  
稱滅此不言滅而云以歸者釋例所云據宗廟社稷已  
亡而君見獲於敵君身雖在與亡無異皆以滅為文則  
定六年鄭游速帥師滅許以許男斯歸是也若社稷宗  
廟不亡君身見獲於敵則云以歸此蔡侯獻舞歸是也

五 肉食謂在位者

注肉食至與也正義曰孟子論庶人云五畝之宅樹之



以桑五十者可以衣帛雞豚狗彘之畜無失其時七十者可以食肉是賤人不得食肉故云在位者也襄二十八年傳說子雅子尾之食云公膳日雙雞昭四年傳說頒冰之法云食肉之祿冰皆與焉大夫命婦喪浴用水蓋位為大夫乃得食肉也

六  
臯比是虎皮

僖二十八年傳稱胥臣蒙馬以虎皮此云蒙臯比而先犯之事與彼同知臯比是虎皮也以胥臣之事譬之必

知定是虎皮其名曰臯比則其義未聞樂記云倒載干戈包之以虎皮名之曰建櫜鄭玄以為兵甲之衣曰櫜橐韜也而其字或作建臯故服虔引以解此

七 妻姊妹同出為姨

釋親云妻之姊妹同出為姨孫炎云同出俱已嫁也

八 書戰書敗例

釋例曰令狐之役晉人潛師夜起而書戰者晉諱背其前意而夜薄秦師以戰告也河曲之戰秦晉交綏長岸

之戰吳楚兩敗交綏並退軍士未憊吳楚俱病莫肯以告故皆書戰而不書敗也邲之戰上軍先陳林父乃敗故書戰又書敗也

九 敗多存少乃稱敗績

喪其功績故曰敗績唯成十六年言楚子鄭師敗績者釋例曰鄢陵之戰楚師徒未大崩楚子傷目而退故指事而言也言楚子身敗非師敗也故言楚子敗績僖十五年晉侯及秦伯戰于韓獲晉侯其君被獲而不書敗

者晉侯戎馬還寧而止為秦所獲師不大崩故不書敗也城濮之戰傳稱楚左右師潰子玉收其卒而止故不敗是二軍敗而經書敗績鄢陵之戰傳稱子反曰臣之卒實奔是一軍敗而杜云師未大崩然敗績者是大崩之名敗多存少乃稱敗績敗少存多則不稱敗績也

十 金僕姑矢名義未聞

注金僕姑矢名正義曰用之射人必知是矢其名僕姑其義未聞

十一 乘丘之戰此傳與禮記勝敗異

公右歇孫生搏之正義曰檀弓云魯莊公及宋人戰于乘丘縣責父御卜國為右車右與此不同者禮記後人所錄聞於所聞之口其事未必實也案傳云公子偃先犯宋師公從而大敗之則本非交戰禮記稱馬驚敗績公隊佐車授綏御與車右皆死之必如記言則是魯師敗績經安得稱公敗宋師于乘丘傳記不同固當記文妄耳

十  
二戲而相愧曰靳

服虔云恥而惡之曰靳傳稱宋人請之若是恥惡其人  
不應為之請魯故杜以為戲而相愧曰靳鄭玄注禮記  
儒行云遭人名為儒而以儒靳故相戲俗有靳故之語  
知是戲而相愧之名也

十  
三宋萬已賜族而不書氏仇牧卿而稱名

釋例曰宋萬賈氏以為未賜族案傳稱南宮長萬則為  
已氏南宮不得為未賜族也推尋經文自莊公以上諸

弑君者皆不書氏閔公以下皆書氏亦足名時史之異  
同非仲尼所皆貶也是杜意以為史有詳畧無義例也  
文八年宋人殺其大夫司馬傳曰司馬握節以書故書  
以官然則有善可褒當變文以見義此仇牧書名不警  
而遇賊無善可褒故不變其文公羊善其不畏強禦故  
言此以異之

十四采邑長曰宰公邑長曰大夫

注叔蕭大夫名正義曰卿大夫采邑之長則謂之宰公

邑之長則曰大夫此則是宋蕭邑大夫也以此年有功  
宋人以蕭邑別封其人為附庸二十三年經書蕭叔朝  
公附庸例稱名故杜以叔為名

十五伐事成始至故書會伐宋

十四年注既伐至大夫正義曰傳稱諸侯伐宋齊請師  
于周則伐事已成單伯始至故云會伐宋言來就宋地  
會之也

十六大夫卿之總號



元年注云單伯天子卿也此云周大夫者大夫亦卿之  
總號

十  
齊桓歸功天子以單伯會鄆赴

若王臣在會不問尊卑皆列諸侯之上僖八年公會王  
人齊侯宋公衛侯許男曹伯陳世子款盟于洮九年公  
會宰周公齊侯宋子衛侯鄭伯許男曹伯于葵丘是也  
此會魯人不與單伯宜列在諸侯之上下言會于鄆耳  
今會字乃在齊侯之上是齊桓歸功天子故赴以單伯

會諸侯為文所以尊天子示名義也此會魯自不與魯所與者皆魯人在上史文以魯為主耳當會之時以大為序魯不在上也

十齊桓請師假王命以示大順

傳注齊欲至之辭正義曰齊既以諸侯伐宋而更請師于周者齊桓始修霸業方欲尊崇天子故請師假王命以示大順耳非慮伐不克而藉王威也

十諸侯無貶稱人例此人總衆國之辭

經書人而傳言諸侯先儒以為諸如此輩皆是諸侯之  
身釋例曰傳滅入例衛侯燬滅邢同姓故名又云穀伯  
綏鄧侯吾離來朝名賤之也又云不書蔡許之君乘楚  
車也謂之失位此皆貶諸侯之例例不稱人也諸侯在  
事傳有明文而經稱人者凡十一條丘明不示其義而  
諸儒皆據案生意原無所出通校春秋自宣公五年以  
下百數十年諸侯之咎甚多而皆無貶稱人者益明此  
蓋當時告命記注之異非仲尼所以為例故也是言諸

侯之貶或書名或沒而不書必不得稱人故以此經書人傳言諸侯為總衆國之辭

二 鄭以王子母弟得立祖王廟

注桓公至守臣正義曰桓公初封西鄭蓋是畿內之國周禮王子母弟有功者得立祖王之廟故桓公始封為君即命臣使典宗祏

二十 石室藏主為祏

宗祏者慮有非常火災於廟之北壁內為石室以藏木

主有事則出而祭之既祭納於石室祔宇從示神之也

二十 父母在得歸寧沒則使鄉寧

十五年注夫人至鄉寧正義曰文姜僖公之女故為桓公姊妹詩美后妃之德云歸寧父母父母在則禮有歸寧襄十二年傳曰秦嬴歸于楚楚司馬子庚聘于秦為夫人寧禮也是父母沒則使鄉寧兄弟不得自歸也但不知令桓公有母以否故杜不明言得失

二十 蛇死為六年之兆

初內蛇與外蛇聞於鄭南門中內蛇死六年而厲公入  
公問於申繻曰猶有妖乎正義曰服虔云蛇北方水物  
水成數六故六年而厲公入公曰猶有蛇妖而厲公得  
入乎

二十  
四 古由猶字通用

古者由猶二字義得通用

二十  
五 蔡侯繩息媯繩訓譽

蔡哀侯為莘故繩息媯以語楚子注莘役在上年繩譽

也正義曰字書繩作誼從言訓為譽

二十  
六 王師敗績或舊凡或新例

王者無敵於天下天下非所得與戰者然春秋之世據  
有其事事列於經則不得不因申其義有時而敗則以  
自敗為文明天下莫之得校正義曰周公制禮理包盛  
衰故周禮載大喪及王師不公之事故舊凡例有敗績  
之文杜以尊卑逆順言之天王不應有戰敗之事成元  
年王師敗績于茅戎是事列於經丘明不得不因申舊凡

之義蘇氏之說義亦如此沈氏不解杜意以京師敗績  
非周公舊凡是孔子新意丘明為傳不得不因申孔子  
新意之義劉炫亦不達杜旨謂杜與沈氏意同非也

春秋左傳要義卷十



欽定四庫全書

春秋左傳要義卷十一

宋 魏了翁 撰

莊公十六年至二十五年

一 伐國以主兵為先序會以大國為上

十六年注宋主至放此正義曰往年齊桓始霸未敢即尸其任救患討罪今為宋伐鄭仍使宋自報怨故宋主兵序於齊上也諸侯會許男在曹滑之上班序上下以

國大小為次不以爵之尊卑也隱五年邾人鄭人伐宋附庸在伯爵之上是以主兵為先也歷檢上下皆然知是春秋常法禮記祭義云有虞氏貴德而尚齒夏后氏貴爵而尚齒殷人貴富而尚齒周人貴親而尚齒而春秋序會不先同姓而大國在上者孔子脩春秋有變周之文從殷之質故也

二同盟言服異猶喪服傳言同居

釋例曰盟者假神明以要不信故載辭或稱同以服異

為言也是言載辭稱同也喪服繼父不同居傳曰嘗同居乃為異居未嘗同居則不為異居春秋同盟亦猶是也

三 齊始霸進陳於衛上

自此以前陳在衛下今在上知齊桓始進之釋例班序譜自隱至莊十四年四十三歲衛與陳凡四會衛在陳上自莊十五年盡僖十七年三十五歲凡八會陳在衛上故知是齊桓進之遂班在衛上終於春秋也

四 以良月復共叔段之孫黨惡

閔元年傳曰萬盈數也數至十則小盈至萬則大盈傳具載定叔事者服虔云定叔之祖共叔段有伐君之罪宜世不長而云不可使共叔無後於鄭言其刑之偏頗鄭厲公以孽篡適同惡相恤故黨於共叔欲令其後不絕傳所以惡厲公也

五 僖王受賂命曲沃伯以一軍為晉侯

晉世家云曲沃武公伐晉侯緡滅之盡以其寶器賂獻

於周僖王僖王命曲沃武公為晉君列為諸侯於是盡  
并晉地而有之曲沃武公已即位三十七年矣自桓叔  
始封曲沃以至武公滅晉凡六十七歲而卒代晉為諸  
侯是僖王命之事也周禮小國一軍晉土地雖大以初  
并晉國故以小國之禮命之

六 齊人執鄭詹釋例集解實同

執諸侯有稱人稱侯之異執大夫者悉皆稱人以執之  
為大夫賤故也劉炫以此注云詣齊見執釋例曰詹本

金方口入二二  
卷十一  
非出使謂二者自相矛盾今知非者齊以鄭不朝而責於鄭鄭令詹詣齊謝罪齊人執之故釋例云元非出聘之使集解云詣齊被執二文雖異事實同耳劉炫不尋此意乃規杜過非也

七  
蠃如鼈一名射景

注蠃如鼈三足生於南越南越婦人多淫故其地多蠃淫女惑亂之氣所生也陸璣毛詩義疏云蠃短狐也一名射景如鼈三足在江淮水中人在岸上景見水中投

人景則殺之故曰射景或謂含沙射人入皮膚其創如疥服虔云偏身漢漢或或故為災

八 王覲羣后饗醴命宥

傳注王之至備設正義曰王饗醴命之宥者王為之設饗禮置醴酒命之以幣物所以助勸也宥助釋詁文周禮掌客王待諸侯之禮上公三饗三食三燕侯伯二饗再食再燕子男一饗一食一燕三禮先言饗是王之覲羣后始則行饗禮也酒正辨五齊之名一曰泛齊二曰

醴齊三曰盎齊四曰緹齊五曰沈齊鄭注云泛者成而  
滓浮泛泛然醴猶體也成而汁滓相將如今恬酒矣盎  
猶翁也成而翁翁然葱白色緹者成而紅赤沈者成而  
滓沈如今造清矣自醴以上尤濁然則以其尤濁故先  
置之示不忘古也知者禮運云燔黍捭豚下即云以燔  
以炙以為醴酪是醴酒在先而有故曰先置醴酒示不忘  
古也

九  
獻酢酬及酬幣命宥之等



禮主人酌酒於賓曰獻賓答主人曰酢主人又酌以酬  
賓曰酬謂之酬幣蓋於酬酒之時賜之幣也所賜之物  
即下玉馬是也傳稱饗醴命宥言其備設盛禮也此注  
命之宥者命在下以幣物宥助僖二十八年命晉侯宥  
注云命晉侯助以束帛以將厚意皆命不同者以彼有  
命晉侯之事故也

十  
號公晉侯同賜是以禮假人

注侯而至人禮正義曰號君不知何爵稱公謂為三公

也周禮王之三公八命侯伯七命是其名位不同也其禮各以命數為節是禮亦異數也今侯而與公同賜是借人禮也假借同義取者假為上聲借為入聲與者假借皆為去聲

十一公子結遂事無益有害

十一凡媵皆送至嫁女之國從適而行

十九年注公子至來伐正義曰公羊傳曰媵者何諸侯娶一國則二國往媵之媵不書此何以書為其有遂事

書大夫無遂事此其言遂何聘禮大夫受命不受辭出境有可以安社稷利國家者則專之可也穀梁文雖不明其意亦為魯女左氏無傳取彼為言故云公羊穀梁皆以為魯女媵陳侯之婦穀梁傳曰其曰陳人之婦畧之也以未入國畧而不言陳侯夫人成九年伯姬歸于宋晉衛齊三國來媵然則為人媵者皆至嫁女之國使之從適而行此鄆是衛之東地蓋陳取衛女為婦魯使公子結送媵向衛至鄆聞齊宋為會將謀伐魯故權事

之宜去其本職不復送女至衛遂與二君會盟故備書之也送女至鄆俾女會盟鄆是盟處故言于鄆非本期送女使至鄆也既盟之後遂不復送女其盟本非公意又失媵陳之好故至冬而三國來伐結之此盟於魯無益故無嘉善之文文八年冬十月壬午公子遂會晉趙盾盟于衡雍乙酉公子遂會雒戎盟于暴四日之間不容反報亦是專命而盟患難俱解故再稱名氏珍而貴之與此異也

三十鬻拳塋于冢闕示死不失職

鬻拳自殺以殉當是近墓之地宣十四年傳稱楚子聞宋殺申舟投袂而起履及於寢皇劒及於寢門之外則寢皇近於門外當是寢門闕也知此經皇亦是冢前闕也且此人生為大閹職掌守門明此亦是守門示死不失職也餘書無經皇之名蓋唯楚有此號也

四十此大閹當如司門非閹人若漢晉城門校尉

以為大閹謂之大伯正義曰周禮天官閹人掌守王宮

之中門之禁鄭玄云閹人司昏晨以啟閉者刑人墨者使守門秋官掌戮墨者使守門刑者使守圜則閹不使刑而鬻拳得為閹者周禮地官之屬有司門下大夫二人掌授管鍵以啟閉國門鄭玄云若今城門校尉主王城十二門此注亦云若今城門校尉官然則鬻拳本是大臣楚人以其賢而使典此職非為刑而役之其為大閹者當如地官之司門非天官之閹人亦主晨昏開閉通以閹為名焉謂之大伯伯長也為門官之長也

十  
五言鬻拳愛君非臣法

注言愛君明非臣法也正義曰何休膏肓云人臣諫君  
非有死亡之急而以兵臨君開篡弑之路左氏以為愛  
君於義左氏為短故注言此以釋何休之難

十  
六圃植瓜蔬園養禽獸

冢宰職云園圃毓草木鄭玄云樹果蔬曰圃園其樊也  
詩云折柳樊圃成十八年築鹿園然則圃以蕃為之所  
以樹果蔬園則築牆為之所以養禽獸二者相類故取

圖為圖

七十子積徧舞六代樂

言樂及徧舞則樂之所有舞悉周徧故知皆舞六代之樂也

八十書文姜薨塋明子母不絕

二十一年注薨寢至書之正義曰經無所闕禮具可知杜為此注者以先儒之說使莊公絕母子之親故於此明之知母子不絕下塋注亦然



十闕西辟象魏之西偏

觀闕象魏其事一也劉熙釋名云闕在門兩旁中央闕然為道也然則其上縣法象其狀巍巍然高大謂之象魏使人觀之謂之觀也闕西辟者辟是旁側之語也服虔云西辟西偏也當謂兩觀之內道之西也

十二王與鄭伯以武公之畧

注畧畧至臯縣正義曰孟子云仁政必自經畧始昭七年傳曰天子經畧諸侯正封封畧之內何非君土孟子

經界即傳之經畧且云封畧之內封是竟則知畧是界也武公東鄭之始封君也言武公之畧則是武公舊竟若其由來不失不須今日復與故知後失其地惠王今復與之隱十一年王取鄆劉為邾之田于鄭蓋桓王之世失之也

二十  
一 鄭伯怨鞏鑑不如虢公爵

鞏是帶也鑑是鏡也此與定六年傳皆鞏鑑雙言則鞏鑑一物故知以鏡飾帶舉今羌胡之服以明之鄭伯謂

厲公子文公也服虔云鞏鑑王后婦人之物非所以賜  
有功爵飲酒器玉爵也一升曰爵爵人之所貴者言鄭  
伯以其父得賜不如虢公為是始惡於王積而成怨僖二  
十四年遂執王使

二十  
肆大青不為葬文姜

穀梁傳曰肆大青為嫌天子之葬也其意言文姜有罪  
不合以禮而葬若不赦不復書葬嫌天子許之明須赦  
而後得葬故為赦也賈逵以文姜為有罪故赦而後葬

以說臣子也魯大赦國中罪過欲令文姜之過因是得  
除以塋文姜杜不明說要文姜出奔之日尚稱夫人夫  
人之名未嘗有貶何須以赦除之此赦必不為文姜但  
夫人以去年七月薨十一月則當合塋乃至此年正月  
經七月始塋如此遲緩必是國家有事須赦解之但不  
知其由耳

二十  
三 陳敬仲使飲齊桓酒必非召公

注齊桓至公酒正義曰春秋之世設享禮以召君者皆

臣擅寵如衛公叔文子宋桓魋之徒始為之耳為之非禮法也敬仲羈旅之臣且知禮者也必不召公臨已知是桓公賢之自就其家會也據敬仲為主人之辭故言飲公酒耳

二十四 敬仲既非召公不得言將享必卜

服虔云臣將享君必卜之示戒慎也此桓公自就其家非敬仲發心請享不得言將享必卜也蓋桓公告其往日乃卜之耳言未卜其夜者詩云厭厭夜飲在宗載考

鄭玄云考成也夜飲之禮在宗室同姓則成於庶姓讓之則止引此敬仲之事云此之謂不成是言敬仲非齊同姓故不敢也

二十五 占辭謂之繇其法當韻

卜人所占之語古人謂之為繇其辭視兆而作出於臨時之占或是舊辭或是新造猶如筮者引周易或造辭卜之繇辭未必皆在其頌千有二百之中也此傳鳳皇于飛下盡莫之與京襄十年傳稱卜禦寇姜氏問繇曰

兆如山陵有夫出征而喪其雄哀九年傳稱晉趙鞅卜救鄭遇水適火史龜曰是謂沈陽可以興兵利以伐姜不利子商三者皆是繇辭其辭並韻則繇辭法當韻也郭璞撰自所卜事謂之辭林其辭皆韻習於古也

二十  
六 遇觀之否皆取前後二卦

遇觀之否正義曰此注坤下巽上觀坤下乾上否及六四爻變諸如此輩皆據周易之文知之劉炫規過云觀之否者為觀卦之否爻屯之比者屯卦之比爻皆不取

後卦之義今刪定以為不然何者以閔元年畢萬筮仕  
遇屯之比云屯固比入僖十五年晉獻公筮嫁伯姬得  
歸妹之睽云士刲羊亦無血歸妹上六爻辭又云歸妹  
睽孤寇張之弧睽之上九爻辭又云歸妹之睽猶無相  
也昭五年明夷之謙云明夷于飛垂其翼又云謙不足  
飛不翔此之等類皆取前後二卦以占吉凶今人之筮  
亦皆如此故賈服及杜並皆同焉劉炫苟異前儒好為  
別見以規杜氏非也



二十 觀國賓王他人有國而已作賓之象  
七

觀國之光利用賓于王二句周易文也此先云不在此  
其在異國後云非此其身在其子孫所以在下覆結先  
云其在後乎後云在異國者其在異國之下更欲演說  
異國是大嶽姜姓其言稍多且須以結末故進其在後  
乎於上先解之也庭實旅百以下方解利用賓于王則  
上句故曰觀國之下未須賓王之句而再言利用賓于  
王者蓋以觀國之光即是朝王之事直言觀光於文不

足故連言賓王但未解賓王之義故於下更重解之傳  
稱引詩斷章則引易論事亦未必如本此言觀國之光  
謂所為筮者觀他人有國之光榮也此有國之人利用  
為賓客於王朝也其意言見其子孫有國作賓於王家  
耳非其身也代陳有國言代陳正適子孫有其國家陳  
滅此興是代之也

二十  
八 不變聚為象變散為象中為互體

注此周至論之正義曰易之為書揲著求爻重爻為卦

爻有七八九六其七八者六爻並皆不變卦下總為之辭名之曰彖彖者才也總論一卦之才德若乾元亨利貞之類皆是也其九六者當爻有變每爻別為其辭名之曰象象者像也指言一爻所像若乾初九潛龍勿用之類皆是也不變者聚而為彖其變者散而為象每爻各有象辭是六爻皆有變象二至四三至五兩體交互各成一卦先儒謂之互體

二十  
九 以艮互體足成觀國光利賓王之象

易稱觀國之光故解其光義言光在此處遠照於他物從他物之上而有明耀者也謂光能遠照於他物有明故下云照之以天光是也六四之爻位在坤上坤為土地山是地之高者居於土上是為土上山也又巽變為乾六四變為九四從二至四互體有艮之象艮為山故言山也山則材之所生此人有山之材言其必大富也上天以明臨下照之以天光言天子臨照之也於是乎又居於土上既富矣而被天照又復居有土地是為國

君之象也易位四為諸侯變而為乾乾為天子是有國  
朝王之象故曰觀國之光利用賓于王覲禮侯氏執圭  
見王王受圭禮成乃出又入行享禮獻國之所有此說  
行享禮也旅陳也庭之所實陳有百品言物備也奉之  
以玉帛謂執玉帛而致享禮被天之照有地之材天子  
賜之土田國君獻國所有天地之美備具焉朝王之儀  
畢足矣故曰利用賓于王

三  
十  
艮為門闕杜改為門庭以解庭實

注艮為至物備正義曰易說卦艮為門闕乾為金玉坤為布帛杜以門內有庭傳言庭實故改言艮為門庭耳杜言諸侯朝王陳贄幣之象者謂陳之以行享禮也覲禮侯氏既見王乃云四享皆束帛加璧庭實唯國所有鄭玄云四當為三大行人職曰諸侯廟中將幣皆三享其禮差又無取於四也

三十 一 巽風行而著於坤土為在異國

風行而著於土正義曰服虔云巽在坤上故為著土也

一曰巽為風復為木風吹木實落去更生他土而長育是為在異國

三十 共工從孫主四岳祭名大岳

注姜姓至四岳正義曰周語稱堯命禹治水共之從孫四岳佐之胙四嶽國命為侯伯賜姓曰姜氏曰有呂賈達云共共工也從孫同姓末嗣之孫四岳官名大岳也主四岳之祭焉

三十一 二至四有艮象故知興於大嶽之後

六四爻變為九四與二共為艮象艮為山故知興於山  
嶽之國姜姓大嶽之後知其將育于姜地之高者莫過  
於山詩云崧高維嶽駿極于天言其大能至天故山嶽  
則配天也且乾在上艮在下亦是山嶽配天之象此人子孫  
養於大嶽之後官尊位高得大嶽之權則其功德有配  
天之大

三十  
四 傳言齊陳終始未知何時改田氏

沈氏云世家桓子生武子啟及僖子乞乞卒子常代之



是為田成子是於敬仲為七世言八世者據其相代在  
位為八世也成子弑簡公專齊政是莫之與大也成子  
生襄子磐磐生莊子白白生大公和和遷齊康公於海  
上和立為齊侯和孫威王稱王四世而秦滅之作傳之  
時完之子孫已盛故傳備言其終始也世家云敬仲之  
如齊以陳字為田氏左傳終始稱陳田必非敬仲所改  
未知何時改耳

三十  
五 南蒯卜亂則不可臧會卜僭乃吉

左傳之初至此始有卜筮故杜於此通說之曲禮曰卜筮者先聖王之所以使民決嫌疑定猶豫也是先王立之本意也因而生義教謂教人以行義南蒯卜為亂不信則不可臧會卜為僭不信乃遂吉二事相反故特引之言卜筮應人行也南蒯在昭十二年臧會在昭二十五年南蒯筮而言卜者卜筮通言耳南蒯則行驗而龜筮不驗臧會則行不驗而龜筮驗

三十  
六

內臣不得外交故祭叔不言使

二十三年注穀梁至使聘正義曰諸言聘者皆言某侯使某來聘此不言使左氏無傳故取穀梁為說穀梁傳云其不言使何也天子之內臣也不正其外交固不與使也然則言內臣不得外交必是畿內之國畿內之國非唯祭耳傳不言為祭公來聘杜言為祭公來聘者但祭叔連祭為文必是祭人虞叔是虞公之弟此祭叔或是祭公之弟故以為為祭公來聘

三十  
七 齊因祭社蒐軍實魯公往觀

注齊因至觀之正義曰魯語說此事云夫齊棄大公之法而觀民於社孔晁云聚民於社觀戎器也襄二十四年傳稱楚子使薳啟疆如齊齊社蒐軍實使客觀之知此亦然釋例曰凡公出皆書如觀社非常故特書

三十

八 書荆人來聘楚始通未成其禮

注不書至其禮正義曰釋例曰楚人之君臣最多混錯此乃楚之初興未閑周之典禮告命之辭自生同異楚武王熊達始居江漢之間然猶未能自同列國故稱荆

敗蔡師荆人來聘從其所居之稱而總其君臣是言楚之始通未成其禮之意

三十杜以嘉樂為嘉禮又朝不屬嘉

注蕭附至野合正義曰無爵而稱朝知是附庸國也公羊傳曰其言朝公何公在外也文連遇于穀是就穀朝公穀是齊地穀梁傳曰朝於廟正也於外非正也是言在外行朝則禮不得具定十年傳稱嘉樂不野合知嘉禮亦不野合嘉禮謂善禮非五禮之嘉也朝於五禮屬

賓

十四 丹楹刻桷加非禮於宗廟以飾夫人

二十四年注刻鏤至盛飾正義曰釋器云金謂之鏤木謂之刻刻木鏤金其事相類故以刻為鏤也桷謂之椽椽即椽也穀梁傳曰刻桷非正也夫人所以崇宗廟也取非禮與非正而加之於宗廟以飾夫人非正也刻桓宮桷丹桓宮楹斥言桓宮以惡莊也是言丹楹刻桷皆為將逆夫人故為盛飾

四十  
一 莊公寵孟任故娶緩而入難

注哀姜至朝廟正義曰公羊傳曰其言入何難也其難奈何夫人不可使入與公有所約然後入唯言有所要不知要何事故云蓋以孟任故也明日戊寅大夫宗婦覲用幣夫人若未朝廟不得受臣覲禮知明日乃朝廟既朝乃見大夫宗婦杜言朝廟者為覲用幣發也書入不書至者釋例曰莊子顧割臂之盟宗寵孟任故即位二十三年乃娶元妃雖丹楹刻桷身自納幣而有孟任

之嫌故與姜氏俱反而異入經所以不以至禮書也

四十 二 大夫宗婦同贄俱見小君

注宗婦至俱見正義曰襄二年葬齊姜傳稱齊侯使諸姜宗婦來送葬諸姜是同姓之女知宗婦是同姓大夫之婦也禮小君至大夫執贄以見明臣子之道禮亦無此文士相見禮稱大夫始見於君執贄夫人尊與君同臣始為臣有見君之禮明小君初至亦當有禮以見也且傳唯譏婦贄不宜用幣不言覲之為非知其禮當然



也大夫當用羔鴈用幣亦為非禮也莊公欲奢夸夫人故使男女同贄惡其男女無別且譏僭為失禮故書之

四十  
三 正禮楹不丹楠不刻

穀梁傳曰禮楹天子諸侯黝垚大夫蒼士黹丹楹禮也注云黝垚黑色黹黃色又曰禮天子之楠斲之礲之加密石馬諸侯之楠斲之礲之大夫斲之士斲木刻楠非正也加密石注云以細石磨之晉語云天子之室斲其椽而礲之加密石馬諸侯礲之大夫斲之士首之言雖

小異要之正禮楹不丹楠不刻故云皆非禮也

四十傳言宗婦覲用幣唯舉非常

孤執皮帛則諸侯之臣有執帛者矣大夫執帛唯上僭耳其帛猶是男所執婦人執幣則全非常事御孫唯諫婦人不宜執幣丘明為諫發傳

四十五等諸侯執玉世子附庸孤卿執帛

典命職曰凡諸侯之適子誓於天子攝其君則下其君之禮一等未誓則以皮帛繼子男公之孤四命以皮帛

眡小國之君是諸侯世子與孤卿執帛也附庸雖則無  
文而為一國之主來則謂之為朝未有爵命不合執玉  
明與世子同執帛也

四十周莊僖二王崩葬皆不見王室弱故

周公忌父出奔虢注周公忌父王卿士辟子國之難惠  
王立而復之注魯桓十五年經書桓王崩魯莊三年經  
書葬桓王自此以來周有莊王又有僖王崩葬皆不見  
於經傳王室微弱不能復自通於諸侯故傳因周公忌

父之事而見惠王惠王立在此年之末正義曰史記十二諸侯年表云莊王元年當魯桓十六年即位十五年而崩僖王元年當魯莊十三年即位五年而崩惠王元年當魯莊十八年即位在十八年而此年傳說惠王之立者杜云傳因周公忌父之事而見惠王立在此年之末是杜以周公忌父此年出奔至惠王立而得復與此記不違

四十  
七

齊殲于遂猶鄭弃其師

夏齊人殲于遂注殲盡也齊人戍遂翫而無備遂人討而盡殺之故時史因而自盡為文釋例曰齊人殲于遂鄭棄其師亦時史即事以安文或從赴辭故傳亦不顯明也

四十  
八 鄭詹不能如叔孫豹故書逃賤之

秋鄭詹自齊逃來注無傳詹不能仗節守死以解國患而遁逃苟免書逃以賤之正義曰仗節守死以解國患當如昭元年叔孫豹之居位待罪也

四十 母弟稱公子

公子友莊公之母弟稱公子者史策之通言母弟至親異於他臣其相殺害則稱弟以示弟義於嘉好之事兄弟篤睦非例所興或稱弟或稱公子仍舊史之文也母弟例在宣十七年

十五 日食大水鼓牲二事皆失之

祭法云天子立七祀諸侯立五祀其門皆曰國門知此門亦國門謂城門也傳稱天災有幣無牲非日月之眚

不鼓則鼓與牲二事皆失故譏之

春秋左傳要義卷十一



欽定四庫全書

春秋左傳要義卷十二

宋 魏了翁 撰

莊二十五年至三十二年

一 六月夏之四月文十五年直六月

傳注非常至月錯正義曰此及文十五年昭十七年皆書六月朔日有食之昭十七年傳稱祝史請所用幣昭子許之平子禦之曰止也唯正月朔慝未作日有食之

於是乎有伐鼓用幣禮也其餘則否大史曰在此月也  
經書六月而史言在此月則知傳言正月之朔慝未作  
者誰此周之六月夏之四月也文十五年傳直說天子  
諸侯鼓幣異禮不言非常知彼六月直六月也此亦六  
月而云非常下句始言唯正月之朔有用幣伐鼓之禮  
明此經雖書六月實非六月故云非常鼓之月長歷推  
此卒未為七月之朔由置閏失所故致月錯不應置閏  
而置閏誤使七月為六月也釋例曰莊二十五年經書

六月辛未朔日有食之實是七月朔非六月故傳云非常也唯正月之朔有用幣伐鼓明此食非用幣伐鼓常月因變而起歷誤也文十五年經文皆同而更復發傳曰非禮者明前傳欲以審正陽之月後傳發例欲以明諸侯之禮此乃聖賢之微旨而先儒所未喻也劉炫云知非五月朔者昭二十四年五月日有食之傳云日過分而未至此若是五月亦應云過分而未至也今言慝未作則是已作之辭故知非五月案二十四年八月

丁丑夫人姜氏入從彼推之則六月辛未朔非有差錯  
杜云置閏失所者以二十四年八月以前誤置一閏非  
是八月以來始錯也

二 正月謂夏四月周六月陰慝未起

注正月至陰氣正義曰昭十七年傳大史論正月之事  
云當夏四月是謂孟夏知正月是夏之四月周六月  
也詩云正月繁霜鄭玄云夏之四月建巳純陽用事是  
謂正月為正陽之月慝惡也人情愛陽而惡陰故謂陰

為惡故云慝陰氣也未作謂陰氣未起也

三 日食日之常聖王因事設教

注日食至大義正義曰古之歷書亡矣漢興以來草創其術三統以為五月二十三分月之二十而日月交會近世為歷者皆以為一百七十三日有餘而日一食是日食者歷之常也古之聖王因事設戒夫以昭昭大明照臨下土忽爾殲亡俾晝作夜其為恠異莫斯之甚故立求神請救之禮責躬罪已之法正陽之月陽氣尤盛

於此尤盛之月而為弱陰所侵故尤忌之

四 用幣請救於上公伐鼓自攻責

社是上公之神尊於諸侯故用幣於社請救於上公伐鼓于朝退而自攻責也日食者月揜之也日者陽之精月者陰之精日君道也月臣道也以明陰不宜侵陽臣不宜揜君以示大義也昭二十九年傳曰故有五行之官是謂五官實列受氏姓封為上公祀為貴神社稷五祀是尊是奉故社以社為上公之神

五 天災有幣無牲詩禮祈禱皆有牲

天災之言兼日食大水也天之見異所以譴告人君欲令改過修善非為求人飲食既遇天災隨時即告唯當告請而已是故有幣無牲若乃亢旱歷時霖雨不止然後禱祀羣神求弭災沴者設禮以祭祭必有牲詩雲漢之篇美宣王為旱禱請自郊徂宮無所不祭云靡神不舉靡愛斯牲是其為旱禱祭皆用牲也祭法曰埋少牢於泰昭祭時也相近於坎壇祭寒暑也王宮祭日也夜明

祭月也幽崇祭星也雩崇祭水旱也鄭玄云凡此以下皆祭用少牢寒暑不時則或禳之或祈之是說祈禱之祭皆用牲

六 月侵日不順故特鼓然月食亦有鼓

易稱是謂災青書稱青災肆赦是青災相類故云青猶災也月侵日為青陰犯陽為逆逆順之事賢聖所重故見其逆事而特鼓之此據日食為說耳傳稱日月之青日月並言則月食亦有鼓周禮大僕職云凡軍旅田役



贊王鼓救日月亦如是日食月食皆有鼓也穀梁傳  
曰天子救日置五麾陳五兵五鼓諸侯置三麾陳三鼓  
三兵大夫擊門士擊柝左氏雖無傳義或然也

七  
晉自文公後司空非卿官而典事同

傳注大司空卿官正義曰傳於比年以來說士為為獻  
公設計晉國以安今又言大司空明任以卿位也直言  
司空者是大夫即司空亞旅皆受一命之服是也晉自  
文公以後世為盟主征伐諸國卿以軍將為名司空非

復卿官故文二年司空士穀非卿也雖則非卿職掌不異成十八年傳曰右行享為司空使脩士為之法是其典事同也

二十年二十六年傳不解經

注為傳至而已正義曰此年傳不解經經傳各自言事伐戎日食體例已舉或可經是直文不須傳說曹殺大夫宋齊伐徐或須說其所以此去丘明已遠或是簡牘散落不復能知故耳上二十年亦傳不解經彼經皆是

直文故就此一說言下以明上

九  
臣卒不名故原仲稱字

注原仲至知譏正義曰玉藻記云士於君所言大夫沒矣則稱諡若字桓二年穀梁傳曰子既死父不忍稱其名臣既死君不忍稱其名是禮臣卒不名陳人不稱其名故魯史亦書其事

十  
季友違禮會外大夫葬

二十七年公子友如陳葬原仲注陳大夫原氏仲字也

禮臣卒不名故稱字季友達禮會外大夫葬具見其事亦所以知譏

一十婦人書歸書來書如

凡諸至于某正義曰釋例曰歸寧者女子既嫁有時而歸問父母之寧否父母沒則使卿歸問兄弟也出者謂犯七出而見絕者也歸者有所往之稱來者有所反之言故嫁謂之歸而寧謂之來見絕而出則以來歸為辭來而不反也如某者非終安之稱歸於某者亦不反之辭

是解其文異之意也此杞伯姬來寧也宣十六年邾伯姬來歸出也文九年夫人姜氏如齊歸寧也魯之夫人無被出者文十八年夫人姜氏歸于齊雖子死自去歸而不反亦出之類故與出同文

二十 西都既賜秦則東都別有召地

召伯稱爵知是王之卿士召康公之封召也當在西都畿內釋例曰扶風雍縣東南有召亭也春秋時召伯猶是召公之後西都既已賜秦則東都別有召地不復知

其所在

三十賜齊侯命為侯伯

僖二十八年傳稱王命尹氏及王子虎策命晉侯為侯伯則知此賜齊侯命者亦賜命為侯伯也彼注云周禮九命作伯則此亦九命之伯謂九州之長為二伯也僖元年傳曰凡侯伯救患分災討罪禮也注云侯伯州長也彼注說齊桓之事亦謂九州之長非州牧也言州長者兼見州牧之事耳

十四 齊伐衛以舍罪各賂稱人

二十八年注齊侯至失之正義曰傳稱齊侯而經書人知其諱取賂以賤者告也詩美僖公之伐淮夷得其元龜象齒大賂南金襄十一年傳稱晉侯伐鄭受鄭之賂告于諸侯皆不以為諱而此諱之者彼服罪致賂乃以得賂為榮此舍罪受賂故以受之為恥會于稷舍宋督取郕鼎亦此之類

十五 書戰伐圍入滅例

莊十年公羊傳曰戰不言伐圍不言戰入不言圍滅不言入書其重者左氏無此義而泓韓鞏邲令狐河曲鄆陵城濮大棘彭衙長岸柏舉之屬皆書戰不書伐此書伐又書戰襄十八年諸侯同圍齊言圍不言伐文十五年晉卻缺伐蔡戊申入蔡書伐又書入丘明無文杜不為說皆是從告而書

十六 衛人及齊人戰被伐者為主

此經既言齊人伐衛不言齊及衛戰而言衛人及齊人



戰者公羊以為伐人者為客被伐者為主以主及客故使衛人主齊尋案經傳令狐河曲大棘彭衙長岸泓韓之屬皆以主及客也乾時升陞及鞏皆魯與人戰以魯為主城濮鄆陵與邲外楚而內晉也柏舉內蔡而外楚也被伐為主或如公羊之說

十書大無麥禾於冬  
七

麥熟於夏禾成在秋而書於冬者計食不足而後總書之此年不言水旱而得無麥禾者服虔曰陰陽不和土

氣不養故禾麥不成傳言饑而經不書者得齊之糴救民之急不至於饑也

十  
八告糴于齊左云禮也公穀云譏也

臧孫至于齊正義曰何休云買穀曰糴告糴者將貨財告齊以買穀魯語云文仲以鬯圭與玉磬如齊告糴曰不腆先君之敝器敢告滯積以紓執事齊人歸其玉而與之糴公羊傳曰何以不稱使以為臧孫辰之私行也君子之為國也必有三年之委一年不熟告糴譏也穀

梁亦然據經魯臣出使例不言使何以當惟此也傳言告糴禮也必不得如二傳之說

十九乞師緩於穀故告糴不言如

服虔云不言如重穀急辭以其情急於糴故不言如齊告糴乞師則情緩於穀故云如楚乞師

二十臧僖伯文仲曾祖

世本孝公生僖伯彊彊生哀伯達達生伯氏鉚鉚生文仲辰辰是臧僖伯曾孫

二十 鄭有城門外郭門遠郊門

注桔杖至門也正義曰此已入一門矣又云入自純門  
又是入一門矣復言縣門不發則更有一門矣不發是  
城門則知純門外郭門桔杖遠郊門也尚書費誓序云  
東郊弗開是郊有門也

二十 繼旄曰旂軍行旂居前殿在後

軍行之次旂最先故宣十二年傳稱令尹南轅反旂  
是旂居前而殿在後也釋天云緇廣充幅長尋曰旂繼

旒曰旆郭璞云旒帛全幅長八尺旆帛續旒末為燕尾者

二十都邑非必四縣四井邑有廟雖小曰都

周禮小司徒職云九夫為井四井為邑四邑為丘四丘為甸四甸為縣四縣為都注引此者以證都大邑小耳經傳之言都邑者非是都則四縣邑皆四井此傳所發乃為小邑發例大者皆名都都則悉書曰城小邑有宗廟則雖小曰都無乃為邑邑則曰築都則曰城為尊宗

廟故小邑與大都同名釋例曰若邑有先君宗廟雖小曰都尊其所居而大之也然則都而無廟固宜稱城城漆是也而穎氏唯繫於有先君之廟患漆本非魯邑因說曰漆有邾之舊廟是使魯人尊邾之廢廟與先君同非經傳義也

二十書新與書新作異延廐義不可知

二十九年注傳例至之辭正義曰馬之所處謂之廐延是廐之名名之曰延其義不可知也傳言新作延廐而

經無作字僖二十年新作南門定二年新作雉門及兩  
觀皆言新作而此獨無作是作傳之後轉寫闕文也釋  
例曰言新意所起言作以興事通謂興起功役之事也此  
稱經文而以不時為譏義不在作也然尋傳足以知經  
闕作字也

二十  
五 馬日中而出入春作廐不時

中者謂日之長短與夜中分故春秋二節謂之春分秋  
分也釋例曰春秋分而晝夜等謂之日中凡馬春分百

草始繁則牧於垆野秋分農功始藏水寒草枯則皆還廐此周典之制也今春而作廐已失民務又違馬節故曰書不時也

二十  
六 春秋唯侵伐襲三名與九伐異

釋例曰侵伐襲者師旅討罪之名也鳴鐘鼓以聲其過曰伐寢鐘鼓以入其竟曰侵掩其不備曰襲此所以別興師用兵之狀也然則春秋之世兵加於人唯此三名周禮大司馬掌九伐之法賊賢害民則伐之負固不服



則侵之天子討罪無掩襲之事唯侵伐二名名與禮合而禮更有七名馮弱犯寡則眚之暴內陵外則壇之野荒民散則削之賊殺其親則正之放弑其君則殘之犯令陵正則杜之內外亂鳥獸行則滅之彼謂王者行兵此據當時實事

二十  
七 龍見戒事至日而畢

傳曰龍見而畢務戒事也謂夏之九月周之十一月龍星角亢晨見東方於是納其禾稼三務畢而戒民以土

功事也火見而致用大火星次角亢而晨見於是致其  
用也水昏正而栽謂夏之十月定星昏而中於是樹板  
榦而興作焉日至而畢謂日既南至微陽始動故土功  
息冬至之後當更修來年農事不得復興土功也

二十  
八

季秋日體在房角亢見東方

今之九月則季秋也月令季秋之月日在房漢書律歷  
志論星之度數云角十二亢九氐十五自角之初至房  
初三十六度晨謂夜之將旦於晨之時日體在房故角

亢見在東方也東方之宿盡為龍星角即蒼龍角也故角亢專得龍名

二十九 十月初心星次角亢東見

襄九年傳曰心為大火星度心五尾十八月令孟冬之月日在尾自心初至於尾末二十三度十月之初心星次角亢之後而晨見東方也致築作之物謂板榦舂楬

三 水昏正謂十月中定星昏而正

五行北方水故北方之宿為水星言水昏正者夜之初

昏水星有正中者耳非北方七宿皆正中也詩云定之方中作于楚宮釋天云營室謂之定孫炎云定正也天下作宮室者皆以營室為正周語云營室之中土功其始是定星昏而正為土功之大候故知水昏正謂十月定星昏而正中時也鄭玄詩箋云定星昏中而正謂小雪時小雪十月之中氣月令仲冬之月昏東壁中室十六度日行一度是十月半而室中十一月初而壁中

三十  
一 獻因獻功獻器皆稱獻捷

三十 齊人楚人失辭稱獻捷

釋例曰歸者遺也獻者自下奉上之稱遺者敵體相與之辭傳曰諸侯不相遺俘齊侯楚人失辭稱獻失禮遺俘故因其來辭見自卑也以其大卑故書以示過此經言獻捷傳言遺俘則是獻捷獻囚俘也襄八年邢丘之會傳稱鄭伯獻捷於會又曰獲司馬變獻于邢丘是獻俘謂之捷也襄二十五年鄭公孫舍之帥師入陳傳稱司空致地司徒致民是不以俘囚歸也亦云子產獻捷于

晉然則無囚而獻其功空有器物亦稱捷也

三十  
三 大都以名通者不繫國

三十二年注小穀至繫國正義曰傳稱為管仲知是齊  
邑管仲所食采邑也吳滅州來晉滅下陽如此之類皆  
不繫國知大都以名通者則不繫國也華亥向寧入于  
宋南里以叛南里非大都不得以名通故繫之宋耳賈逵  
云不繫齊者世其祿然則彼不繫者豈皆世其祿乎

三十  
四 莊公薨于路寢得其正

公羊傳曰路寢者何正寢也喪大記曰男子不死於婦人之手婦人不死於男子之手君夫人卒于路寢鄭玄云言死必於正處也釋例云詳內事謹凶變

三十  
五 神降于萃謂無形有聲

傳注有神至號地正義曰易稱神也者妙萬物而為言者也雖復鬼神之神亦無形象可見今言神降則人皆聞知故知有神謂有神聲以接人也吳孫權時有神自稱王表言語與人無異而形不可見今此神降于萃蓋

亦王表之類神者氣也當在人上今下接人故稱降國語說此事稱內史過對云其丹朱之神乎

三十  
六 以其物享神若甲乙日祭先脾之類

以其物享之其物不知所謂更以至日釋之謂此神初降之日以其至日之物也月令春其日甲乙夏其日丙丁中央土其日戊己秋其日庚辛冬其日壬癸所用之物月令具有其文注引甲乙所用舉一隅也丙丁日至祭用肺玉服皆赤也戊己日至祭用心玉服皆黃也庚



辛日至祭用肝玉服皆白也壬癸日至祭用腎玉服皆  
玄也

三十  
七 神厭虢而賜土田猶晉筮驪姬亦吉

神聰至能得正義曰國語曰耳目心之樞機也故必聰  
和而視正聰和則聰視正則明然則所謂聰明者不聰  
淫辭不視邪人之謂也襄七年傳曰正直為正正曲為  
直言正者能自正直者能正人而壹者言其一心不二  
意也依人而行謂善則就之惡則去之虢多薄德神所

不依其何土之能得言賜之土田必虛妄也若神所不依則不應賜土而言神賜之土田者神厭其人不告以實猶晉獻公筮以驪姬為夫人亦云吉耳

三十 投蓋謂投身以蓋物或云投車蓋

稷門為魯南城門蓋時人猶以名之故知也投蓋者謂自投其身以蓋物故以為走而自投反覆門上劉炫規過云公言犖有力焉如杜所說勁捷耳非有力當謂投車蓋過於稷門今知不然者周禮車蓋以物帛為之輕

而帆風非可投之物且傳直云投蓋于稷門不云過稷門明知自投反覆稷門之上今時猶然且游楚超乘而出女曰子南夫也則勁捷之人亦是勇力之士

三十  
九 成季酖僖叔鳩或為酖

說文云鳩毒鳥也一名運日廣雅云鳩鳥雄曰運日雌曰陰諧廣志曰鳩鳥形似鷹大如鵝毛黑喙長七八寸黃赤如金食蛇及橡實常居高山巔晉語諸公讚云鳩鳥食蝮以羽翮櫟酒水中飲之則殺人舊制鳩不得渡

江有重法石崇為南中郎得鴈以與王愷養之大如鵝  
喙長尺餘純食蛇虺司隸傳祇於愷家得此鳥奏之宣  
示百官燒於都街是說鴈鳥之狀也以其因酒毒人故  
字或為醢

十四歲饑築郿備難與城西郭同

冬築郿注郿魯下邑傳例曰邑曰築正義曰國都為上  
邑為下故云魯下邑襄十九年城西郭傳曰懼齊也是  
其事也此年大無麥禾時歲饑虛恐或侵伐故築之以

備難從西郭之例故不發傳也

四十二  
耦謂墾傷晉室

大戎狐姬生重耳大戎唐叔子孫別在戎狄者小戎子  
生夷吾小戎允姓之戎子女也晉伐驪戎驪戎男女以  
驪姬驪戎在京兆新豐縣其君姬姓其爵男也納女於  
人也女歸生奚齊其娣生卓子驪姬嬖欲立其子賂外  
嬖梁五與東闕嬖五姓梁名五閨闈之外者東闕嬖五  
別在闕塞者亦名五皆大夫為獻公所嬖幸視聽外事

使言於公使大子居曲沃重耳居蒲夷吾居屈羣公子  
皆鄙唯二姬之子在絳二五卒與驪姬譖羣公子而立  
奚齊晉人謂之二五耦注鄙邊邑二耜相耦廣一尺共  
起一伐言二人俱共墾傷晉室

春秋左傳要義卷十二

欽定四庫全書

春秋左傳要義卷十三上

宋 魏了翁 撰

閔公元年至僖公四年

一 啟開因漢諱而亂

魯世家閔公名開莊公之子惠王十六年即位杜世族譜云名啟方漢景帝諱啟啟開因是而亂

二 國人喜而呼曰季子來歸史因書之

季是友之字也子者男子之美稱國人賢而思之得其還魯喜而呼曰季子來歸史因其言而書之傳稱請復季友齊侯許之是得齊之力齊侯許納故曰歸也

三 管仲請齊救邢以從簡書

詩小雅出車之篇美文王勞來諸侯令賢臣出使此臣在外思歸而以王事自勉言我豈不思歸乎誠思歸也但畏此簡書來告急耳諸侯有事則書之於簡遣使執簡以告命告則須救故畏而不歸也此簡書者同有所



惡則相憂之謂也請救邢以從簡書傳稱勤則不匱安則敗名齊侯縱心宴安不欲征伐故言耽毒以勸之

四 管夷吾謚敬

注敬仲管夷吾正義曰敬謚謚法夙夜勤事曰敬仲字管氏夷吾名也

五 趙魏世系

史記趙世家夙生共孟孟生趙哀晉語云趙哀先君之戎御趙夙之弟也杜以夙為哀兄從晉語也魏世家畢

萬生武子世本畢萬生芒季季生武仲州州即犢也杜以萬為犢之祖父依世本也

六 萬盈數魏大名

萬盈至名也正義曰以算法從一至萬每十則改名至萬以後稱一萬十萬百萬千萬萬萬始名億從是以往皆以萬為極是至萬則數滿也論語云巍巍乎是魏為高大之名

七 辛廖晉大夫辛雖周人而枝流於晉

杜云辛廖晉大夫則以畢萬筮仕在晉國而筮劉炫云  
若在晉國而筮何得云筮仕於晉又辛甲辛有並是周  
人何故辛廖獨為晉大夫今知不然者傳以畢萬是畢  
國子孫今乃筮仕於晉言於晉以對畢耳非謂筮時在  
他國也案昭十五年傳云及辛有之二子董之晉於是  
乎有董史注云辛有周人二子適晉為大史則辛氏雖  
出於周枝流於晉劉炫用服氏之說以為畢萬在周筮  
仕於晉又以晉國不得有姓辛而規杜過其義非也

八 魏後為諸侯公侯復始之驗

必復其始正義曰萬是畢公之後公侯之子孫必當復其初始言此人子孫又將為公侯也及春秋之後三家分晉而魏為諸侯是其筮之驗也

九 喪終吉祭為禘莊公喪未闋別立廟祭

注三年至示譏正義曰僖三十三年傳曰凡君薨卒哭而祔祔而作主特祀於主烝嘗禘於廟禘祀為吉祭說喪事而言禘知禘是喪終而吉祭也襄十五年晉悼公

卒十六年傳稱晉人答穆叔云以寡君之未禘祀知三年喪畢乃為禘也喪畢而為禘祭知致新死之主於廟也新主入廟則遠主當遷知其遷入祧者祭法云天子七廟有二祧則祧是遠祖廟也周禮守祧掌守先王先公之廟祧其遺衣服藏焉廟之遠主其廟既遷主無所處固當遷入祧也鄭玄以二祧為文王武王之廟遷主入廟當各從其班穆入文祧昭入武祧禮諸侯五廟更無別祧則當謂太祖之廟為祧也遠主初始入祧新死

之主又當與先君相接故禮因是而為大祭以審序昭穆故謂之禘禘者諦也言使昭穆之次審諦而不亂也莊公以其三十二年八月薨至此年五月唯二十二月故喪制未闕也公羊傳曰其言于莊公何未可以稱宮廟也曷為未可以稱宮廟在三年之中矣三年之中未得以禮遷廟而特云莊公知為莊公別立廟廟成而吉祭也僖八年禘于太廟文二年大事于太廟宣八年有事于太廟彼言大事有事亦禘祭也則禘禮必于太廟

今未可以吉祭而為吉祭又不于太廟故詳書以示譏也既云吉禘又云于莊公是其詳也

十 高侯來平魯亂值新君立遂結盟

注蓋高至美稱正義曰莊二十二年及齊高侯盟于防自爾以來不見經傳故云蓋高侯也往年仲孫湫勸齊侯使寧魯難今而高子適魯知齊侯使來平魯亂也當齊侯初命高子之時慶父未出僖公未立及其至魯值僖公新立因遂與魯結盟而立之不云齊侯使者盟非

齊侯之命故不稱使也齊侯不使之盟而高子輒為盟者齊侯使之來平魯亂新君既立遂盟而安之亦足稱齊侯之意其盟非專擅也魯人不能自安高子盟以安之魯人貴之故不書其名子者男子之美稱故呼之曰高子穀梁傳曰其曰來喜之也其曰高子貴之也盟立僖公也

一宮中門有闈閨閤之等

釋宮云宮中之門謂之闈其小者謂之閨小閨謂之閤



彼就小門之內更別以為二名大率宮中之門皆小故云宮中小門也名之曰武則其義未聞

季子以私恩存孟氏故畧慶父罪

叔牙云慶父材者始有黨慶父之心本其惡未顯見故季子隱之而書其卒若自死然慶父弑二君其罪已章著計當書其誅殺季子推親親之恩欲同之叔牙存孟氏之族故畧其罪不書殺也又不可全同叔牙故又不書卒慶父子孫終為孟氏是季子推親親之恩枉正法

耳

十  
三周社亳社之間執政所在

注兩社至所在正義曰王者取五色之土封以為社若封諸侯隨方割其土色之以白茅賜之使立國社魯是周之諸侯故國社謂之周社哀四年亳社災是魯國有亳社穀梁傳曰亳社者亳之社也亳亡國也亡國之社以為廟屏戒也則亳社在宗廟之前也周禮小宗伯掌建國之神位右社稷左宗廟則諸侯亦當然定二年雉

門及兩觀災則兩觀在雉門外也禮運云昔者仲尼與  
於蜡賓事畢出遊於觀之上蜡祭在廟故出廟而遊於  
觀也由此言之宗廟社稷在雉門之外分左右廂也鄭  
玄考校禮文以為魯制三門庫雉路天子諸侯皆三朝  
圖宗人之嘉事則有路寢庭朝日出視朝則在路門之  
外其詢國危詢國遷詢立君周禮朝士所掌外朝之位  
者乃在雉門之外耳雉門之外左有亳社右有周社間  
于兩社是在兩社之間朝庭詢謀大事則在此處是執

政之所在也

十四季氏亡則魯不昌後果與魯俱滅

季氏亡則魯不昌正義曰服虔云謂季友出奔魯弑二君案傳子般既死乃云成季奔陳閔公既死乃云成季適邾皆君死乃出奔非由出奔乃致君死杜雖無注義必不然當謂季友子孫與魯升降從此以後季氏世為上卿終於春秋禮記稱悼公之喪季昭子問為君何食以後雖則無文當是與魯俱滅也

十離變乾故云同復于父敬如君所

此雖六五爻變不取周易之文筮者推演卦意自為其辭也離是乾子還變為乾故云同復于父言其尊與父同也國人敬之其敬如君之處所言其貴與君同也說卦乾為君父言其身之尊則云同復于父言其為人所敬則云敬如君所屬意異故分為二也

十衛戴公立十數日亦稱一年

戴公名申世本世家文經傳皆云十二月狄入衛衛人

東徙渡河收集離散乃立戴公此年之末文公即位計戴公為君不過十數日耳言立一年卒者滅而復興不是嗣位故成喪為謚文公繼世而立明年始為元年故戴公雖復日少亦稱一年年表亦以此年為戴公元年今定本云以其年卒

十魚軒魚服以魚獸之皮為飾

注魚軒至為飾正義曰詩云象弭魚服此云魚軒則用魚為飾其皮可以飾器物者唯魚獸耳故云以魚皮為

飾陸璣毛詩義疏云魚獸似猪東海有之其皮背上有斑文腹下有純青今人以為弓韃步义者也其皮雖乾燥為弓韃矢服經年海水將潮及天陰毛皆起水潮還及晴則毛復如故雖則數千里外可以知海水之潮自相感也

十  
八歸重錦三十兩兩五尋

注重錦至匹也正義曰服虔云重牢也杜以其遺夫人貴美不貴牢故以為錦之熟細者雜記曰納幣一束束

五兩兩五尋八尺曰尋則五尋四丈謂之兩者分為兩段故也謂之匹者兩兩合卷若匹偶然也

十九 臯落氏赤狄別種

宣十五年晉師滅赤狄潞氏潞則上黨潞縣在晉之東北云伐東山臯落氏知此亦在晉東是赤狄別種也臯落其氏族也此族之人狄之渠帥也

二十 杜以驪姬二五奚齊曲沃證辛伯之言

注驪姬至本成正義曰辛伯之語先有成文其內寵之



徒不為晉發故劉炫云二五嬖賤不得為二政太子不以曲沃作亂不得為大都而杜云驪姬為內寵二五為外寵奚齊為嬖子曲沃為大都者今刪定以為辛伯之言雖不為晉要晉國之亂事理相當故杜以事託之二五為耦壑傷晉室曲沃彊大太子奔之又築屈與蒲終為禍難但此據太子故以曲沃為文劉君不達此旨而為規過違傳意也

二十 齊仲孫因出疆來省難嘉而字之

冬齊仲孫來仲孫齊大夫以事出疆因來省難非齊侯  
命故不稱使也還使齊侯務寧魯難故嘉而字之來者  
事實省難其志也故經但書仲孫之來而傳尋仲孫之  
志正義傳稱仲孫湫則名湫而字仲孫也杜言以事出  
疆或使向他國因來省魯難明年即有高子來盟是齊  
侯用其言魯人知其事不書其名嘉而字之杜云稱字  
嘉之則仲孫是字猶楚之孫伯或亦以孫為字也

二十 畢萬筮仕遇屯之比

初畢萬筮仕於晉遇屯

䷂

震下坎  
上屯

之比

䷇

坤下坎  
上比

屯初

九變而為比屯固比入吉孰大焉其必蕃昌屯險難所以為堅固比本親密所以得入震為土震變為坤車從馬震為車坤為馬正義曰晉語云司空季子占公子重耳之筮云震車也坤彖云利牝馬之貞是坤為馬也下注震為足震為長男坤為母坤為衆皆說卦文也足居之震為足兄長之震為長男母覆之坤為母衆歸之坤為衆六體不易初一爻變有此六義不可易也合而能

固安而能殺公侯之卦也比合屯固坤安震殺故曰公侯之卦正義曰震之為殺傳無明文晉語云震車也車有威武昭二十五年傳云為刑罰威獄以類其震曜殺戮是震為威武殺戮之意故震為殺也

二十  
三 榮在河南其北亦稱榮

及狄人戰于榮澤衛師敗績遂滅衛此榮澤當在河北正義曰禹貢豫州榮波既瀦導沆水入于河溢為榮是榮在河南此時衛都河北為狄所敗乃東徙渡河故知

此榮澤當在河北但洸水入河乃洸被河南多故專得榮其北雖少亦稱榮也

二十四馬曰乘衣禪複具曰稱

周禮校人云乘馬一師四圉圉養一馬故云四馬曰乘以乘車並師五人必駕四馬故也喪大記曰袍必有表不禪衣必有裳謂之一稱是衣禪複具曰稱

春秋左傳要義卷十三上